

Federacion di motor sport lo keda encarga cu pista di Palo Marga



ORANJESTAD – Ayera tardi a keda firma un acuerdo di entendimiento (MoU) cualifica como 'histórico' den mundo di motor sport.

E MoU aki a keda firma entre gobierno, representa pa minister di infraestructura, Otmar Oduber y minister di deporte, Dangui Oduber; y di otro banda e representantenan di cada disciplina di motor sport den instalacion di Surfside Marina. E meta tras di esaki tabata pa crea un federacion di motor sport na Aruba, pa yuda encamina e proceso pa mehora e actividad aki riba pista di Palo Marga.

Por a sinti cu tabatin unanimidad entre gobierno y e representantenan di e diferente disciplina di motor sport pa trece mas organizacion y structura den beneficio di e mesun actividad popular aki, realisa riba pista di Palo Marga. Minister Dangui Oduber a laga sa cu na momento cu nan a drenta gobierno, hunto cu su colega Otmar Oduber a discuti riba e situacion cu tin na Palo Marga, y nan a explora tur posibilidad cu como gobierno nan por haci pa bin cu cambio muy specialmente den e facilidad aki. "Esaki no ta un logro di gobierno. Sino cu esaki ta un logro di e de-

porte di motor sport...," el a bisa.

Despues cu nan a intercambia pensamiento, nan a haya fundamental cu mester start e proceso aki cu e creacion di un federacion, cu lo ta encarga cu e maneho di e facilidad di Palo Marga. Asina careranan ta wordo organisa bek di un forma mas safe y cu miho infraestructura, haciendo inversionnan necesario. Minister di deporte a laga sa cu pa prome biaha den historia nan por a trece tur e partidonan hunto na mesa. Cu tur hende tin e mesun pensamiento y intencionnan. "Nos kier rebiba motor sport," el a

bisa. Segun e dos mandatario, un federacion ta sumamente importante pa rebiba e actividad aki tan gusta na Aruba.

Otmar Oduber a reitera loke su colega di deporte a bisa. Pero tambe el a bisa cu su responsabilidad como minister di infraestructura ta Palo Marga como facilidad cu ta pertenece na pais Aruba. Tambe despues di varios decada, e prome federacion a keda institui pa keda responsable di e pista di Palo Marga, pa medio di e MoU firma na beneficio di tur disciplina di motor sport. E forma cu nan a yega na otro pa medio di e MoU no solamente ta bay garantiza e estado di e pista. Pero tambe un aspecto importante cu tin di haber cu seguridad riba nos careranan.

Ta conoci cu personanan amante di e sport aki ta practica e sport aki di forma ilegal y irresponsabel riba nos careranan den oranan laat di anochi. E echo cu awor lo bay

tin un Palo Marga mas accesibel lo brinda e oportunidad na hobennan y personanan pa tin un compleho caminda nan por eherce e deporte di motor. "Y pa mantene e aspecto di seguridad riba caminda tambe," el a bisa.

Di parti di e representantenan di e diferente disciplina di motor sport presente den e acto di firma di MoU a laga sa cu no tur ta presente, y cu sigur den e proceso di organizacion aki, cada disciplina lo apunta e representante cu nan ta desea. Esunnan presente ta consciente cu por ta nan estadia lo ta uno temporal, pero si importante, pa e prome movicion pa duna mas organizacion y structura na motor sport por cuminsa di biha. Richard Every a elogia y gradici e minister presenta pa asina percura cu tur e motor sport ta mas cerca di otro riba un facilidad cu ta Palo Marga. E ta reconoce cu e proceso aki lo demanda hopi trabou, y e no ta uno facil.

